

**IN FUNERE
EXCMI AC
REUMI VIRI
FRANCISCI DEL
VIVO AD S...**

Agostino Cappello



Respicite, quoniam non sibi soli laboravit, sed omnibus exquirantibus Disciplinam.

Ecll. c. XXXIII.

Ergone dum haec spectatissima Ecclesia suo viduata Parente ingemiscit, atque haec Sacerdotalis Cathedra, quae haud amplius vocem Pastoris sui, in doctrina in integritate in gravitate verbum sanum irreprehensibile proferentis, est auditura, conticescit: dum nonnisi lacrymas funeri, moestis prae tanta jactura animis, pia popularium turba, ut dignum erat, perfundit, nec nisi questibus luctuosis extrema grati animi atque obsequentis officia, cujuscumque coetus et ordinis homines, memoriae ac cineribus praeclarissimi viri Francisci Del Vivó, ad S. Ambrosii Curionis vigilantissimi, certatim rependunt: Ego mediis in litationibus, piaculis, precibus, hoc ipso in limine, ex hac ipsa veritatis Cathedra, quae orbata tanto Magistro est; vestro in conspectu, Excmi ac Revmi PP., quos tanti Collegae doctrina et praesentia jucundabat quammaxime atque exornabat; ante vestrum oculos, ornatissimi Sacerdotes, qui tanti Praesulis obitu contristati, justa piis

ejus manibus parentalia persolvitis; demum in hac tanta Auditorum frequentia, qui omnes (ut videor) communis parentis casum effusis lacrymis defleturi accessere : Ego , inquam , verba proferre ausim , ac vestrum animos praemoestitudine dejectos , erigendos solandos fovendos aliquantisper ac recreandos quodammodo , orationis veluti suavitate , viribus licet impar , aggrediar ? ...

Hoc sane munus mihi ex abrupto demandatum ne pertimerem , fecere imprimis vestrum benignitas ac singularis humanitas : dein spectatissimi viri merita , quae jam in tuto posita , nemo sapiens non demiratur , quisque memorat , quisque extollit : quas sane laus ita debetur , ut vel silentio ea praeterire aequitas non patiatur , vel in iis exornandis numquam possit deficere quod commendetur . Tot enim tantaque praesto sunt ornamenta virtutis , quae sacerdotalem Francisci animum locupletabant : tot pietatis ac religionis insignia quae imitanda post se reliquit exempla : tot doctrinae ac sapientiae , quibus inter caeteros praestabat , praeclara merita : tot tantique pro grege suo , cui , in partem solitudinis adscitus , verbo et exemplo praeserat , exanthlati labores : tot denique in commune animarum bonum , Civitatis atque Dioecesis hujus emolumentum , juventutis in Ecclesiasticis studiis promovendae subsidium , curae sollicitudinesque : ut ea omnia singillatim prosequi , neque orationis hujus fines , neque temporis angustiae patiantur : aliunde vero ea vel obiter attinge-

re, et dignum tanti viri memoria jure ac merito quisque pervideat, et plurimum dolori leniendo ex ejus obitu praeconcepto, levamen afferat et solatium. Quis enim nesciat, hoc unum esse prae coeteris quod nos de praestantissimorum virorum jactura contristatos solatur quammaxime ac fovet, nimirum: quod licet in iis quod erat mortale occubuit, id tamen quod erat coelitus datum mortis jacula non persensit, animus nempe, fide, sapientia, virtute pollens, pietate denique ac religione exornatus: cujus sane memoria et numquam interci-det, et plurimum ad virtutem atque sapientiam exquirendam atque fovendam, et praestitit semper atq. praestabit.

Age ergo: si fletum cohibere in tanto obitu humanitas atque justitia non patitur, misceatur saltem religiosi gaudii lacrymis, *habet enim*, ut ait Ambrosius, *et laetitia lacrymas suas*. Sinamus mortuos sepelire mortuos suos: nos dignum, super exanimi Sacerdotis Francisci Del Vivo, Ecclesiae hujus, nostrique Coetus ornamenti conspicui, funereum tumulum, virtutum ejus laudibus tributum solvamus. Quid plura memorem Auditores? praesto est laus Sapientiae ore prolata, ac toto vitae suae cursu tam laudabiliter expleto a Francisco promerita: *Respicite, quoniam non sibi soli laboravit sed omnibus exquirentibus Disciplinam*. Totum quod vixit non sibi sed caeteris vixit: haud melius tamen sibi vivere potuit, qui sapientia, virtute, zelo Divini honoris atque animarum procurandae salutis, ita sibi coeterisque vixit ut bene beateque viveret. Attendite.

7

termittam, quod magis laudi verti debet Francisco, quod etsi humili loco natus Emporii in Etruria anno rep. sal. M. DC. XLVI., nobilitatem quam ex genere ortu non hausit, ingenio, scientia, moribus, munere, gradu, longe promeruit et adeptus est: et liberam atque ingenuam quam nactus est conditionem, magis quam a natura acceperit, meritorum vi copia atq; praestantia reddidit illustriorem. En videlicet veri nominis nobilitatem, quam qui despiciunt, ipsi se ignobiliores omnibus hominibus portendunt, qui vero assequuntur, inter praestantes viros merito habentur et sunt. Nasci enim in magno culmine, Casus fortasse (ut ajunt) verius dicere, Providentiae est: ad magnum autem virtutis culmen atque Sapientiae fastigium provehi studio atq; labore, id profecto in summo honore et habitum semper est, et semper habendum.

Ecquis non merito suspicetur juvenem, qui praestantioris genere indolem praeseferens, si quid honestum, si quid decorum, si quid laude dignum, si quid Majorum exemplis rite probatum, si quid Religioni consentaneum, si quid virtuti consonum, id unum sentiat, id unum diligat, id unum assequi totis viribus atque lacertis contendat? qui contemptis mundani honoris illecebris, soli Deo placere cupiens, vitae primordia per omnes virtutis gradus ad perfectionem exerceat? qui, neglectis omnibus, quae oblectamenta vulgo dicuntur aetatis, maxima autem sunt impedimenta virtutis, vitae semitas atque Sapientiae fidenter arripiat?

Mirum ! si qui juvenem Francisco prudentiorem atque studiosiorem demirari potuerint, qui scientiis addiscendis, dum sedulam navabat operam Florentiae, in hac videlicet inclyta Scientiarum Artiumque Parente et Altrice, sub tutela avunculi sui Amadei (qui eum domi suae receptum summa diligentia in disciplinis omnibus excolendum curabat) ita studiis vacabat adsidue, ut ad Pietatis ac Religionis opera impensis viribus adlaboraret. Ingenuam sane Juvenis indolem et ad majora capessenda comparatam noverunt profecto et admirati sunt, quotquot habuit tum in Ecclesiasticis Exercitiis, quibus proludebat, seu vitae Magistros seu rectores et gubernatores ac vocationis suae iudices et consiliarios, tum in Disciplinis omnibus addiscendis seu Doctores seu contubernales in Florentino Clericorum Gymnasio, sub pietissimo ac sanct. mem. Antistite Francisco Cajetano Incontrio, qui eum plurimum et diligebat, et plurimum Ecclesiae huic adjumento fore aliquando juvenem lectissimum auspiciabatur, si ad sacrum Presbyteratus Ordinem, ut erat in votis ejus, virtutibus jam maturerentem proveheret. Quod tamen ut ea qua par est dignitate, scientia, virtute iniret Franciscus et laudabiliter exerceret, ad majorem sapientiae copiam sibi in suorum proximorum utilitatem comparandam, in Alma Pisana Academia, juris utriusque Lauream et conquisivit et promeruit, et vita et moribus longe illustravit. In qua sane diuturna ac profunda exercitatione, quid aliud in votis habuit Fran-

ciscus; quid aliud egit, quid aliud quaesivit, quam, juxta illud Apostoli monitum, sibi et doctrinae attendere; quo emenso alacriter Studio- rum curriculo, omnique jugi tum humanarum tum divinarum scientiarum thesauro sibi comparato, ad altiora atque majora sapientiae ac dignitatis culmina viam sibi sterneret, adytum panderet, ingenio ac viribus properaret?

Et recte quidem, Auditores! Noverat siquidem Franciscus alteque animo infixum gestabat: Sacerdotii gradum, gradum esse luminis, sapientiae, ac virtutis, ad quem si neminem nisi vocatum licet accedere nemini certe vocato aliunde viam sibi aperire est, quam moribus, scientia, doctrina, Divina praesertim atque Ecclesiastica eruditione referta, quae et Legem Domini valeat ipse internoscere, et disciplinam doctrinae suae omnibus exquirentibus palam facere atque explanare. Noverat et benenoverat, Sacerdotale onus Angelicis quidem humeris importabile, onus esse caritatis et laboris, ad quod quisque vocatus, ut legatione rite fungatur in iis quae sunt ad Deum, praestare debet quam maxime ut nedum dona et sacrificia offerat pro peccatis, sed in id etiam totus incumbat ut in aedificationem Corporis Christi, quod est Ecclesia, adsidue adlaboret: nec sibi tantum contentus vivere, proximorum quoque saluti se devovere Ecclesiaeque bono enixis viribus cooperari satagat atq. perficiat. Noverat ministerium lucis atq. aedificationis quo novae legis sacerdotes novo veluti fulgore coruscant, in eo esse positum, ut doctrinae inventus thesau-

rus haud abscondatur ut servetur, sed ut Sacerdos, veluti petra salis in populo, fidelium mentes condire, Divinaeq. Sapientiae lumine quo ipse perfunditur, et valeat et velit illustrare: angelicis quidem moribus collucentibus ut hi qui ignorant et errant redarguantur, deinde doctrina atque sapientia cum zelo charitatis ita conjuncta et adlaborante ut is qui ex adverso est vereatur, nullus adsit qui non ad virtutem atque pietatem aedificetur.

Hoc sane si nosset, et bene nosset Franciscus, vel ex eo pateat, Auditores, quod ad dignitatis culmen assumptus, totus in sanctis exequendis muneribus, totus in difficillimis exercendis officiis, totus in comparandis praeclaris virtutum meritis, omniq. fructuum uberrima segete reportanda ex duplicis sacerdotalis talenti negotiatione sibi concredita, adlaboravit. Quid hic persequar vitae ejus sanctimoniam, graves et bene compositos mores, et ad normam Ecclesiasticae regulæ ita conformatos, ut merito quisque eum suspicari, vereri, in deliciis habere, eumque studio prosequi, cultuque prorsus non vulgari et communi afficere sponte gestiret? Quid memorem qua sanctitate didicisset vas suum possidere in sanctificatione et honore, et puras levare manus, et incruenti Sacrificii hostiam quotidie libare atque offerre, qua Sacerdotalis Dignitas et exsurgit, et nutritur, et roboratur; et crescit? Quid orationis assiduum studium, ac Fidei veritatum profunda meditatio, qua tantum in coeteris virtutibus profecit, eos uberes edidit fructus, ut nil nisi grave, nil nisi mode-

ratum, nil nisi decorum in ejus vel opere vel sermone portenderetur? Vos testes advoco qui eum demirati estis: nos ipsi testemur qui ejus vitae semitas, veluti e vestigio, inspeximus et contemplati sumus. Atque hinc religionis efficacis zelus, hinc in Proximum effusa charitas, hinc morum ad exemplum composita gravitas, et humanitas, et prudentia, et non fucata animi simplicitas, cum doctrinae laude atque sapientiae amore conjuncta. Sed quid plura nunc afferam, cum et reliquae hujusce Orationis partes, recensendis majoribus ejus virtutibus sint destinatae?

Quid enim Auditores? Tanta virtutum copia, ac disciplinarum omnium segete uberrima cumlatus Franciscus, adhuc sub modio lucerna lucens delitesceret? Id quidem secum in animo volutabat, id expetebat sinceris votis, id ea qua praestabat humilitate et modestia sollicite curabat Franciscus: rite perpendens quanti sit in apertum prodire et super candelabrum Ecclesiae poni ut luceas omnibus qui in domo sunt: simulque revolvens quod coelestis desiderii studium custodire non sufficit qui hoc ab humanis laudibus non abscondit. At secus ac sibi proposuerat, divinitus parabatur. Privatam hominis vitam ita prudenter actam, adeo sapienter exultam, tam pie sancteque ad virtutem exercitam, majora ac clariora in publicum edenda gesta, muniaque laudabilia capessenda, quid ni sequerentur et cumlarent?

Apposite illud in promptu venit quod in sapientialibus habet Sermo divinus: „si Dominus

„ magus voluerit, spiritu intelligentiae reple-
 „ bit illum, et ipse tamquam imbres mittet elo-
 „ quia sapientiae suae: ipse dirigit consilium
 „ ejus et disciplinam, et in absconditis Parabo-
 „ larum conversabitur. In medio magnatorum
 „ ministrabit, et in conspectu Praesidis appa-
 „ rebit „. Appareat inquam in conspectu
 Praesidis Franciscus, et grave onus docendi
 atque explanandi sacros Ecclesiae Canones,
 piaev juventuti in laudatissimo Clericorum
 Florentino Ascoeterio informandae, suscipiat,
 digne pertractet, sancte exerceat, profunda-
 que qua pollet eloquii vi omnigenaque erudi-
 tione perficiat. Quid enim memorem multipli-
 cem Ecclesiasticae Historiae suppellectilem
 qua Dogmatum morumque scientiam, Jurisque
 Ecclesiastici Prudentiam, et rerum verborum-
 que copia, et diserta atque erudita oratione
 exornabat, explanabat quam facile atque a-
 bunde tradebat, simul ac profunda qua prae-
 stabat doctrina, implicatissimas de difficillimis
 rebus quaestiones ac controversias enodabat?
 Plaudere omnes, omnes mirari: solus ipse sibi
 despectus, ut qui de se quam humillime senti-
 ret, nihilque aliud praee oculis adsidue versa-
 ret quam ut attentius in edocendis juvenibus
 incumberet, quo vel sic Ecclesiae bono atque
 incremento, quod unice ei erat in votis, quam-
 maxime adlaboraret. Eo consilio fretus, diffi-
 cile dictu est, quot et quam uberes retulerit de
 tot laboribus fructus in tot tantisque quos in
 Scientia Sanctorum instruxit et informavit ex
 frequentissimis auditoribus, quos in Sacrorum

Canonum Disciplina erudit, **Ecclesiae**q, in-
juribus et vidicandis et tutandis strenuos ef-
fecit, ac veluti in palaestra exercere curavit.
Haud melius certe demandato sibi muneri sa-
tisfecisse poterat **Franciscus**, qui dum suorum
Auditorum obsequium, amorem et benevolen-
tiam sibi comparabat, **Sapientissimi Antistitis**
aestimationem, communem omnium doctorum
virorum plausum, nostrique **Collegii** vota (qui
eum plenis suffragiis ab anno 1774. sibi adsci-
verat et cooptaverat socium) digne pro meritis
possidebat.

Eximiam viri doctrinam, morigeramque vi-
tae rationem nuperus **Metropolitanae** hujus **Ec-
clesiae** **Decessor**, numquam satis digne laudan-
dus, **Antonius Martinus**, eum ut ut reluctanter
inter primores sui **Presbyterii** **Cardines** quæis
Cura animarum (difficile onus) est demanda-
ta, assumpsit, atque ad hanc **S. Ambrosii** specta-
tissimam **Ecclesiam** gregemque multiplicem re-
gendum et gubernandum anno 1785. decrevit,
probavit, constituit. Quin tanta erat doctrinae
fama ac probitatis opinio qua apud **Doctiss.** **Ant-
istitem** fruebatur **Franciscus**, ut eum in **Duo-
decemviros** adlectum qui **Sacris Initiandorum**
Ordinibus praesunt **examinum Iudiciis**, voluerit
quoque inter **Operum edendorum Censores** ad-
numerari: saepe etiam in difficillimis maxima-
rum rerum **discriminibus** sibi a consiliis adle-
gerit, vocaverit, adsciverit: saepissime coe-
nobiiis etiam **Virginum dicatarum** praefecerit,
iterumq. donaverit. Tanti videlicet fecerat e-
gregium virum **Antistes** adeo in discernendis

praeclaris quibuslibet sapiens, atque in seligendis suis administris prudens cantusque. Nec eum fefellit opinio, aut praeconcepta in hujusce ecclesiae commune commodum atque incrementum, elusit spes. Vix enim Franciscus novi muneris officio fungi ex obedientia, coepit, ac statim (ut dignum decet Sacerdotem qui sal Terrae doctrinae et vitae splendore evasit) Fidelium mentes condire, populum regere atque docere. animarum lucra quaerere, et verbum vitae in aeternitatis cibum alendae familiae dispendere, sui muneris fecit, assidue curavit, enixe peregit; id unum prae oculis habens ut non quae sua essent, sed quae Iesu Christi quaereret; idque unum solícite cupiens, ut tamquam dignus Christi Minister et dispensator fidelis inveniretur et esset.

Sane ni angustiae temporis, et brevitatis statutae amor me detinerent, Auditores, late hic campus orationi meae patesceret, quo Francisci indefessum in animabus curandis studium, in peccatoribus ad poenitentiam convertendis laborem, in bonis omnibus verbo et exemplo iuvandis promovendisque ad virtutem, studium vobis obtexerem. Id unum sufficiat ante vestrum oculos ponere qui eum e vestigio admirati estis, sanctamque ejus jucundamque conversationem atque morigeram vitae rationem inspexistis: quod nullum fecit finem docendi, nulla ei laborum requies, nullum pascendi gregis, quem in partem sollicitudinis gubernabat, curae et laboris incommodum quod non aequa mente solum; sed alaeri promptoque animo ad sene-

etiam usque, scilicet quamdiu vixit, pertulerit sustinueritque.

Id unum indoluit, quod, teterrima tempestate illa qua res humanæ prorsus dejectæ divinaque Iura omnino inter nos confusa atque permixta susdeque versa ingemuit Orbis pene universus, Gallorum copiis Italiam undique ferro vastantibus, pro summa calamitate a grege suo avulsus, haud certe sine magno vitæ discrimine atque incommodo; Gallias obses petere compulsus est anno 1799., quo tempore et plurimi inter primores Urbis et Orbis e suis sedibus sunt exturbati, atque in Fidei, ut videtur, et Relligionis testimonium, in remotas cruentasque Terras procul acti et projecti. Nec certe aliud ingemuit quam Relligionis quod undique parabatur exitium, sui populi cladem, sui gregis, cuius pastor factus ex animo, salutem inhiabat, perniciem atq. ruinam.

At Deus Omnipotens qui suorum labores, nec consolationis expertes dimittit, nec sinis esse perpetuos, et vota pii Exulis benigne excepit, et Ecclesiae suae utique bono, sui gregis solatio, bonorum omnium gratulationibus, reduncem Franciscum nostrum donavit atq. concessit. Nova interim insperataque aderat nostris jactatis finibus pax atque tranquillitas, novaque ad Etruriae regimen Regum progenies properabat. Hinc nova Francisco honorum copia et laborum haud exigui nominis exercitatio, quæ virum virtute ac meritis cumulatum, novis iisque peculiaribus honoris atque observantiae characteribus muneribusque insigniret.

Quaeritur Ludovico Hisp. Inf. tunc temporis Etruriae Rege nobis dato, qui ad Confessiones excipiendas, ad ingenuum sanctissimumque Principem in Scientia Sanctorum provehendum, sit praeficiendus. Franciscus interea ad tantum munus electus, animum nimis ab humanis honoribus abhorrentem et gerebat et tenuit semper inviolabiliter et servavit. Hinc factum, ut mediis licet actus in Regiae Aulae fulgoribus, licet inter D. Stephani Equites ex obedientia cooptatus, novisq. insignitus honoribus, eum tamen omnes ea humilitatis laude ac vitae modestissimae ratione, quam nunquam dimisit pollentem demirati sunt universi, ut vel sic magis dignum se honoribus praeberet.

Sanctum hoc ministerium erga piissimum Regem eo consilio fretus et suscepit et tenuit Franciscus ad obitum usque Principis Optimi, ut vel magis posset Ecclesiae rebus, ea tempestate nimium jactatis, suis consiliis suaque ope succurrere.

Heu! tamen vanam mortalium spem! heu nimis citam atque praeproperam rerum humanarum vicissitudinem! Rursum bellorum strepitus, arma, discordiae: rursum novis jactata fluctibus Ecclesiae Navis periclitatur conteri, ni summa prudentia, qui in specula positi gregem vel in toto vel in parte regunt, se gerant. Quo se vertat Franciscus, quid agat, quid proferat, cum sanctissimo Florentinae Ecclesiae Praesule Antonio Martinio morte intercepto ad caeteras calamitates illud accessit quod universali Ecclesiae capite Pio Papa VII, ab Apostolica sede avulso,

et procul a suis finibus exturbato, magnis tempestatum fluctibus Ecclesia ageretur, ac poene in apertum impelleretur exitium, inimicorum vi atque astutia, Ecclesiasticae Auctoritatis Iura violare tentante, ac per fas et nefas Regulas omnes Ecclesiasticas subvertente? Quo se vertat Franciscus!

Nequaeso ulla ejus nomini suspicio erroris, aut fraudolentiae, vel adulationis subrepat. Longaevam viri gravitatem, inimici ipsi Religionis verentur, boni omnes suspicantur. Ipse intentatus dimissus est gregi suo propius incumbere, atque intra Ecclesiae suae fines silentii providam certe rationem tenere. Sperabat siquidem fore, ut conatibus inimicorum Christi prudentia, oratione, gemitibus, magis quam armis elusis, fractis, contritis, Ecclesia sua tandem pace redonaretur, et Florentinae huic Cathedrae sua tandem lux afflueret.

Affulsit tandem, et optato nobis rerum ordine redeunte, Ecclesiae pace post tot discrimina rerum foelici omine restituta, Immortali Pio Papa VII. in Petri Solio, triumphali reditu, revertente, Etruriae votis reddito Ferdinando III. Austriaco Opt. Clem. atque in avito Throno foeliciter regnante: tandem in Zenobii, Antonini, Andreae Cathedra vigilantissimus Pastor inlatus est Petrus Franciscus Moralius, qui virtutes doctrinamque Francisci nostri perspectas et diu probatas pernoscens, eum ut olim Incontrius Martinusque, a consiliis habuit ac Clericorum in SS. Ordinibus initiandorum, nec non Presbyterorum ad animarum curam eligendorum exa-

mini interesse voluit, et saepe saepius adsoivit.

At Deus fideli suo Seni pro tot in ejus gloriam exanthlatis laboribus requiem jam disposuerat, et diro licet, at summa animi fortitudine perpresso, morbo correptum, eum remuneraturus, de carnis ergastulo liberat. Flere omnes, Patrem, Pastorem, pauperum praesidium sublatum communi moesta voce, undique iugeminare in hac inopinata tanti capitis extinctione. Extinctionem? Ah! subito dolori vox ista ignoscatur. Nonne potius in clariorem atque indeficientem commutanda splendorem haec lux est? Qui enim non sibi soli laboravit, sed omnibus exquirentibus disciplinam, quis dubitet, non mercedem laborum a Domino suscepturum, eumque qui Ecclesiam Dei doctrina et meritis illustravit, non in perpetuas quoque aeternitates effulsurum?

Salve igitur, Senex sanctissime, qui aliquando securus, laborum tuorum praemia retuleris. Te patre amantissimum tui populares, te Magistrum optimum quotquot in rerum Divinarum Scientia ac morum disciplina informasti luvnes, te Collegam meritissimum hujus almae Universitatis Doctores conclamant, praedicant, extollunt: te amici omnes in desiderio, te pauperes in voto, te cuncta Civitas habet in memoria et in laude. Vale atque iterum vale.

Te **P.** habeat.

A $\text{\textcircled{P}}$ Ω

FRANCISCO · IOSEPHI · FILIO · DEL · VIVO

DOMO · EMPOLIA · LOCO · HONESTO

IURICONSULTO · ET · CURIONI

AD · HOC · DIVI · AMBROSII · TEMPLUM

A · F · C · INCONTRIO · A · MARTINIO · P · F · MORALIO

FLORENTINIS · PONTIFICIBUS

SIBI · DOCTRINA · PIETATE · DEVINCTIS

IN · CONSULTORUM · CONCILIUM · ET · DUODECEMVROS

SACRIS · INITIATIS · PROBANDIS · COOPTATO

COLLEGIO · RERUM · DIVINARUM · DOCTORUM · FLORENTIAE

NEC · NON · COLUMBARIAE · SOCIETATI · ADSRIPTO

OBSIDI · TEMPORUM · ACERBITATE · GALLIA · PERAGRATA

HISPANIA · VERO · SACRIS · EXPIATORIIS · IN · AULA · PRAEPOSITO

A · LUDOVICO · HISP · INF · ETRURIAE · REGE

E · VITA · EXC · XIV · KAL · JUN · ANNI · MDCCCXVII · AET · SUAE · LXX ·

CAJETANUS · DEL · VIVO · JOSEPHUS · PAGANIUS · TESTAMENTI · CURATORES

MARIANUS · NEPOS · EX · FRATRE · HAERES · P ·

